

四庫全書

子部

# 欽定四庫全書

子部

御纂朱子全書卷四十九

詳校官中書<sub>臣</sub>張姚成

編修<sub>臣</sub>倉聖脈覆勘

覆校官中書<sub>臣</sub>王彛憲

校對官中書<sub>臣</sub>汪日章

謄錄舉人<sub>臣</sub>徐秉文

欽定四庫全書

御纂朱子全書卷四十九

理氣一

總論

天下未有無理之氣亦未有無氣之理

有是理後生是氣自一陰一陽之謂道推來此性自有

仁義

先有箇天理了却有氣氣積為質而性具焉

問先有理抑先有氣曰理未嘗離乎氣然理形而上者  
氣形而下者自形而上下言豈無先後理無形氣便  
粗有渣滓

理氣本無先後之可言然必欲推其所從來則須說先  
有是理然理又非別為一物即存乎是氣之中無是  
氣則是理亦無掛搭處氣則為金木水火理則為仁  
義禮智

問理與氣曰伊川說得好曰理一分殊合天地萬物而

言只是一箇理及在人則又各自有一箇理

有是理便有是氣但理是本而今且從理上說氣如云  
太極動而生陽動極而靜靜而生陰不成動已前便  
無靜程子曰動靜無端蓋此亦是且自那動處說起  
若論著動以前又有靜靜以前又有動如云一陰一  
陽之謂道繼之者善也這繼字便是動之端若只一  
開一闔而無繼便是闔殺了又問繼是動靜之間否  
曰是靜之終動之始也且如四時到得冬月萬物都

歸窠了若不生來年便都息了蓋是貞復生元無窮  
如此

問有是理而後有是氣未有人時此理何在曰也只在  
這裏如一海水或取得一杓或取得一擔或取得一  
椀都是這海水但是他為主我為客他較長久我得一  
不久耳

問理在氣中發見處如何曰如陰陽五行錯綜不失條  
緒便是理若氣不結聚時理亦無所附著

問先有理後有氣之說曰不消如此說而今知得他合下是先有理後有氣耶後有理先有氣耶皆不可得而推究然以意度之則疑此氣是依傍這理行及此氣之聚則理亦在焉蓋氣則能凝結造作理却無情意無計度無造作只此氣凝聚處理便在其中且如天地間人物草木禽獸其生也莫不有種定不會無種了白地生出一箇物事這箇都是氣若理則只是箇潔淨空闊底世界無形迹他却不會造作氣則能

醞釀凝聚生物也

問有是理便有是氣似不可分先後曰要之也先有理  
只不可說是今日有是理明日却有是氣也須有先  
後

問未有天地之先畢竟是先有理如何曰未有天地之  
先畢竟也只是理有此理便有此天地若無此理便  
亦無天地無人無物都無該載了有理便有氣流行發  
育萬物曰發育是理發育之否曰有此理便有此氣流



行發育理無形體曰所謂體者是強名否曰是曰理  
無極氣有極否曰論其極將那處做極

或問理在先氣在後曰理與氣本無先後之可言但推  
上去時却如理在先氣在後相似

可機問大鈞播物還是一去便休也還有去而復來之  
理曰一去便休耳豈有散而復聚之氣

問氣之伸屈曰譬如將水放鍋裏煮水既乾那泉水依  
前又來不到得將已乾之水去做他

問上帝降衷於民天將降大任於人天佑民作之君天  
生物因其材而篤作善降百祥作不善降百殃天將  
降非常之禍於此世必預出非常之人以擬之凡此  
等類是蒼蒼在上者真有主宰如是耶抑天無心只  
是推原其理如此曰此三段只一意這箇也只是理  
如此氣運從來一盛了又一衰一衰了又一盛只管  
恁地循環去無有衰而不盛者

人呼氣時腹却脹吸氣時腹却厭論來呼而腹厭吸而

腹脹乃是今若此者蓋呼氣時此一口氣雖出第二口氣復生故其腹脹及吸氣時其所生之氣又從裏趕出故其腹却厭老子曰天地之間其猶橐籥乎動而不屈虛而愈出橐籥只是今之鞞扇耳

理搭於氣而行

以氣言則春夏秋冬以德言則元亨利貞在人則為仁義禮智元亨利貞理也有只四段氣也有只四段理便在氣中兩箇不曾相離

問理與數曰有是理便有是氣有是氣便有是數蓋數  
乃是分界限處

此身只是箇軀殼內外無非天地陰陽之氣如魚在水  
外面水便是肚裏水鰕魚肚裏水與鯉魚肚裏水只  
一般

氣聚成形理與氣合便能知覺如火得脂膏便有許多  
光燄蓋所覺者心之理也能覺者氣之靈也

人之所以為人其理則天地之理其氣則天地之氣理

無迹不可見故於氣觀之

以上語類  
二十三條

天地之間有理有氣理也者形而上之道也生物之本也氣也者形而下之器也生物之具也是以人物之生必稟此理然後有性必稟此氣然後有形

荅黃道夫

所謂理與氣決是二物但在物上看則二物渾淪不可分開各在一處然不害二物之各為一物也若在理上看則雖未有物而已有物之理然亦但有其理而已未嘗實有是物也大凡看此等處須認得分明又

兼始終方是不錯

答劉叔文

有此理後方有此氣既有此氣然後此理有安頓處大  
而天地細而螻蟻其生皆是如此又何慮天地之生  
無所付受耶要之理之一字不可以有無論未有天  
地之時便已如此了也

答楊志仁

問天地之間有理有氣理常不移而氣不常定中庸曰  
大德必得其名必得其位必得其壽理固當如此然  
孔子無位顏子夭死蓬華之士固有老死而名不著

者豈非氣使之然耶故君子道其常而不道其非常  
然竊疑理先而氣後今理既不足以勝氣則凡福善  
禍淫之說不驗常多何以為天地之常經意謂氣雖  
不同然亦隨世而異堯舜禹以聖人在上天下平治  
以和召和則氣亦醇正而隨於理如春秋戰國之時  
刑殺慘酷則氣亦隨之而變而理反不能勝此處亦  
當關於人事否曰此於前段論性命處已言之矣雖  
是所感不同亦是元氣薄耳

答鄭  
子上

有是理即有是氣氣則無不兩者故易曰太極生兩儀而老子乃謂道先生一而後一乃生二則其察理亦

不精矣

答程可久

論萬物之一原則理同而氣異觀萬物之異體則氣猶相近而理絕不同也氣之異者粹駁之不齊理之異

者偏全之或異幸更詳之自當無可疑也

答黃商伯

氣之所聚理即在焉然理終為主此即所謂妙合也

答王

子合



所疑理氣之偏若論本原即有理然後有氣故理不可以偏全論若論稟賦則有是氣而後理隨以具故有是氣則有是理無是氣則無是理是氣多則是理多是氣少即是理少又豈不可以偏全論耶

答趙致道

理固不可以偏正通塞言然氣稟既殊則氣之偏者便只得理之偏氣之塞者便自與理相隔是理之在人亦不能無偏塞也橫渠論受光有大小昏明而照納

不二其說甚備

答杜仁仲

所論氣稟有偏而理之統體未嘗有異得之明道又謂

不可以濁者不為水亦是此意也

荅杜  
仁仲

盖理則純粹至善即氣則雜糅不齊內君子外小人凡所以抑陰而扶陽者乃順乎理以裁成輔相而濟夫

氣數之不及者也又何病乎

荅或  
人

性只是理不可以聚散言所謂精神魂魄有知有覺者皆氣之所為也故聚則有散則無若理則初不為聚散而有無也但有是理則有是氣苟氣聚乎此則其

理亦命乎此耳

答廖子晦

理有動靜故氣有動靜若理無動靜則氣何自而有動靜乎且以目前論之仁便是動義便是靜此又何關

於氣乎

答鄭子上。以上文集十三條

太極

太極只是一箇理字

問太極不是未有天地之先有箇渾成之物是天地萬物之理總名否曰太極只是天地萬物之理在天地

言則天地中有太極在萬物言則萬物中各有太極  
未有天地之先畢竟是先有此理動而生陽亦只是  
理靜而生陰亦只是理

萬物四時五行只是從那太極中來太極只是一箇氣  
迤邐分做兩箇氣裏面動底是陽靜底是陰又分做  
五氣又散為萬物

問太極解何以先動而後靜先用而後體先感而後寂  
曰在陰陽言則用在陽而體在陰然動靜無端陰陽

無始不可分先後今只就起處言之畢竟動前又是靜用前又是體感前又是寤陽前又是陰而寐前又是感靜前又是動將何者為先後不可只道今日動便為始而昨日靜更不說也如鼻息言呼吸則辭順不可道呼吸畢竟呼前又是吸吸前又是呼

太極非是別為一物即陰陽而在陰陽即五行而在五行即萬物而在萬物只是一箇理而已因其極至故名曰太極

若無太極便不翻了天地

太極理也動靜氣也氣行則理亦行二者常相依而未嘗相離也當初元無一物只有此理有此理便會動而生陽靜而生陰靜極復動動極復靜循環流轉其實理無窮氣亦與之無窮自有天地便是這物事在這裏流轉一日有一日之運一月有一月之運一歲有一歲之運只是這箇物事滾將去

太極未動之前便是陰陰靜之中自有陽之根陽動之

中又有陰之根動之所以必靜者根乎陰故也靜之  
所以必動者根乎陽故也

太極之有動靜是天命之流行也或疑靜處如何流行  
曰惟是一動一靜所以流行如秋冬之時謂之不流  
行可乎若謂不能流行何以謂之靜而生陰也觀生  
之一字可見

自太極至萬物化生只是一箇道理包括非是先有此  
而後有彼但統是一箇大原由體而達用從微而至

著

問一理之實而萬物分之以為體故萬物各具一太極  
如此說則太極有分裂乎曰本只是一太極而萬物  
各有稟受又自各全具一太極爾如月在天只一而  
已及散在江湖則隨處而見不可謂月分也

太極分開只是兩箇陰陽括盡了天下物事

原極之所以得名蓋取樞極之義聖人謂之太極者所  
以指夫天地萬物之根也周子因之而又謂之無極



者所以大無聲無臭之妙也

太極無方所無形體無地位可頓放若以未發時言之  
未發却只是靜動靜陰陽皆只是形而下者然動亦  
太極之動靜亦太極之靜但動靜非太極耳故周子  
只以無極言之未發固不可謂之太極然中含喜怒哀  
哀樂喜樂屬陽怒哀屬陰四者初未著而其理已具  
若對已發言之容或可謂之太極然終是難說此皆  
只說得箇髮歸形容當自體認

動不是太極但動者太極之用耳靜不是太極但靜者太極之體耳

或問太極曰太極只是箇極好至善底道理人人有一太極物物有一太極周子所謂太極是天地人物萬善至好底表德

才說太極便帶著陰陽才說性便帶著氣不帶著陰陽與氣太極與性那裏收附然要得分明又不可不拆開說

問先生說太極有是性則有陰陽五行此說性是如何  
曰想是某舊說近思量又不然此性字為稟於天者  
言若太極只當說理自是移易不得易言一陰一陽  
之謂道繼之者則謂之善至於成之者方謂之性此  
謂天所賦於人物人物所受於天者也

某嘗說太極是箇箴頭底動時屬陽未動又屬陰了

太極自是涵動靜之理却不可以動靜分體用蓋靜即  
太極之體也動即太極之用也譬如扇子只是一箇

扇子動搖便是用放下便是體才放下時便只是這一箇道理及搖動時亦只是這一箇道理

梁文叔云太極兼動靜而言曰不是兼動靜太極有動靜喜怒哀樂未發也有箇太極喜怒哀樂已發也有箇太極只是一箇太極流行於已發之際斂藏於未發之時

或問太極曰未發便是理已發便是情如動而生陽便是情

太極者如屋之有極天之有極到這裏更沒去處理之極至者也陽動陰靜非太極動靜只是理有動靜理不可見因陰陽而後知理搭在陰陽上如人跨馬相似才生五行便被氣質拘定各為一物亦各有一性而太極無不在也

問劉子所謂天地之中即周子所謂太極否曰只一般但名不同中只是恰好處書惟皇上帝降衷於下民亦只是恰好處極不是中極之為物只是在中如這

燭臺中央簪處便是極從這裏比到那裏也恰好不曾加些從那裏比到這裏也恰好不曾減些

太極是箇大底物事四方上下曰宇古往今來曰宙無一箇物似宇樣大四方去無極上下去無極是多少大無一箇物似宙樣長遠亘古亘今往來不窮自家心下須常認得這意思問此是誰語曰此是古人語象山常要說此語但他說便只是這箇又不用裏面許多節拍却只守得箇空蕩蕩底公更看橫渠西銘

初看有許多節拍却是狹充其量是甚麼樣大

以理言之則不可謂之有以物言之則不可謂之無

或問康節云道為太極又云心為太極道指天地萬物  
自然之理而言心指人得是理以為一身之主而言  
曰固是但太極只是箇一而無對者

太極是五行陰陽之理皆有不是空底物事若是空時  
如釋氏說性相似

極是道理之極至總天地萬物之理便是太極

太極只是極至更無去處了至高至妙至精至神是沒去處濂溪恐人道太極有形故曰無極而太極是無之中有箇極至之理

問太極理也理如何動靜有形則有動靜太極無形恐不可以動靜言曰理有動靜故氣有動靜若理無動靜則氣何自而有動靜乎

自見在事物而觀之則陰陽函太極推原其本則太極生陰陽



問太極便是人心之至理曰事事物物皆有箇極是道理之極至或曰如君之仁臣之敬便是極曰此是一事一物之極總天地萬物之理便是太極太極本無此名只是箇表德

太極如一本生上分為枝幹又分而生花生葉生生不窮到得成果子裏面又有生生無窮之理生將出去又是無限箇太極更無傳息只是到成果實時又却略少歇也不是生到這裏自合少止所謂終始萬物

莫盛乎艮止是生息之意

只是這一箇物事所以萬物到秋冬時各自收斂閉藏  
忽然一下春來各自發越條暢這只是一氣一箇消  
一箇息只如人相似方其默時便是靜及其語時便  
是動那箇滿山青黃碧綠無非是這太極

所謂太極者不離乎陰陽而為言亦不雜乎陰陽而為  
言

問萬物各具一太極此是以理言以氣言曰以理言

無極而太極只是無形而有理周子恐人於太極之外  
更尋太極故以無極言之既謂之無極則不可以有  
底道理強搜尋也問太極始於陽動乎曰陰靜是太  
極之本然陰靜又自陽動而生一靜一動便是一箇  
闢闔自其闢闔之大者推而上之更無窮極不可以  
本始言

問南軒云太極之體至靜如何曰不是又云所謂至靜  
者貫乎已發未發而言如何曰如此却成一不正當

尖斜太極

以上語類  
三十九條

天地之間只有動靜兩端循環不已更無餘事此之謂  
易而其動其靜則必有所以動靜之理是則所謂太  
極者也

所謂太極者便只在陰陽裏所謂陰陽者便只在太極  
裏今人說是陰陽上別有一箇無形無影裏是太極  
非也

性猶太極也心猶陰陽也太極只在陰陽之中非能離

陰陽也然至論太極則太極自是太極陰陽自是陰陽惟性與心亦然所謂一而二二而一也

以上三條出性理太

極圖

小註

此道字即易之太極一乃陽數之奇二乃陰數之偶三乃奇偶之積其曰二生三者猶所謂二與一為三也若直以一為太極則不容復言道生一矣

答程泰之

動靜無端陰陽無始本不可以先後言然就中間截斷言之則亦不害其有先後也觀周子所言太極動而

生陽則其未動之前固已嘗靜矣又言靜極復動則已靜之後固必有動矣如春夏秋冬元亨利貞固不能無先後然不冬則何以為春而不貞又何以為元就此看之又自有先後也

答王子合

前書所謂太極不在陰陽之外者正與來教所謂不倚於陰陽而生陰陽者合但某以形而上下者其實初不相雜故曰在陰陽之中吾丈以形而上下者其名不可相雜故曰不在陰陽之外雖所言不同而

初未嘗有異也

答程可久

太極之義正謂理之極致耳有是理即有是物無先後  
次序之可言故曰易有太極則是太極乃在陰陽之  
中而非在陰陽之外也今以大中訓之又以乾坤未  
判大衍未分之時論之恐未安也形而上者謂之道  
形而下者謂之器今論太極而曰其物謂之神又以  
天地未分元氣合而為一者言之亦恐未安也

答程可久

太極含動靜則可以本體而言也謂太極有動靜則可

以流行而言也若謂太極便是動靜則是形而上下者不可分而易有太極之言亦贅矣

答楊子直

太極乃兩儀四象八卦之理不可謂無但未有形象之可言爾故自此而生一陰一陽乃為兩儀而四象八卦又是從此生皆有自然次第不由人力安排然自孔子以來亦無一人見得至邵康節然後明其說極有條理意趣可玩恐未可忽更詳之

答林黃中

未發者太極之靜已發者太極之動

答呂子約



銖問極之為言究竟至極不可有加之謂以狀此理之  
名義則舉天下無以加此之稱也故常在物之中為  
物之的物無之則無以為根主而不能以有立故以  
為在中之義則可而便訓極為中則不可以有形者  
論之則如屋之有脊棟困廬之有通天柱常在此物  
之中央四面八方望之以取正千條萬別本之以有  
生禮所謂民極詩所謂四方之極其義一也未知推  
說如此是否曰是

荅董叔重○以  
上文集八條

天地

天地初間只是陰陽之氣這一箇氣運行磨來磨去磨得急了便拶許多渣滓裏面無處出便結成箇地在中央氣之清者便為天為日月為星辰只在外常周圍運轉地便在中央不動不是在下

天運不息晝夜輒轉故地權在中間使天有一息之停則地須陷下惟天運轉之急故凝結得許多渣滓在中間地者氣之渣滓也所以道輕清者為天重濁者

為地

問天有形質否曰只是箇旋風下輒上堅道家謂之剛  
風人常說天有九重分九處為號非也只是旋有九  
耳但下面氣較濁而暗上面至高處則至清至明耳  
天地始初混沌未分時想只有水火二者水之滓脚便  
成地今登高而望羣山皆為波浪之狀便是水泛如  
此只不知因甚麼時凝了初間極輒後來方凝得硬  
問想得如潮水湧起沙相似曰然水之極濁便成地

火之極清便成風霆雷電日星之屬

問自開闢以來至今未萬年不知已前如何曰已前亦  
須如此一番明白來又問天地會壞否曰不會壞只  
是相將人無道極了便一齊打合混沌一番人物都  
盡又重新起又問生第一箇人時如何曰以氣化二  
五之精合而成形釋家謂之化生如今物之化生者  
甚多如蟲然

方渾淪未判陰陽之氣混合幽暗及其既分中間放得

開闢光朗而兩儀始立邵康節以十二萬九千六百年為一元則是十二萬九千六百年之前又是一箇大闔闢更以上亦復如此直是動靜無端陰陽無始小者大之影只晝夜便可見五峯所謂一氣大息震蕩無垠海宇變動山勃川湮人物消盡舊迹大滅是謂鴻荒之世嘗見高山有螺蚌殼或生石中此石即舊日之土螺蚌即水中之物下者却變而為高柔者却變而為剛此事思之至深有可驗者

問天地未判時下面許多都已否曰只是都有此理  
天地生物千萬年古今只不離許多物

地却是有空缺處天却四方上下都周匝無空缺逼塞  
滿皆是天地之四向底下却靠著那天天包地其氣  
無不通恁地看來渾只是天了氣却從地中迸出又  
見地廣處

天包乎地天之氣又行乎地之中故橫渠云地對天不  
過

問天地之所以高深曰天只是氣非獨是高只今人在  
地上便只見如此高要之連地下亦是天又云世間  
無一箇物事大故地恁地大地只是氣之渣滓故厚  
而深也

天地但陰陽之一物依舊是陰陽之氣所生也

康節言天依形地附氣所以重複而言不出此意者惟  
恐人於天地之外別尋去處故也天地無外所以其  
形有涯而其氣無涯也為其氣極緊故能扛得地住

不然則墜矣氣外更須有軀殼甚厚所以固此氣也  
若夫地動只是一處動亦不至遠也

古今歷家只是推得箇陰陽消長界分爾如何得似康  
節說得那天依地地附天天地自相依附天依形地  
附氣底幾句

問天依形地附氣曰恐人道下面有物天行急地閣在  
中

天明則日月不明天無明夜半黑淬淬地天之正色



天只是一箇大底物須是大著心腸看他始得以天運  
言之一日固是轉一匝然又有大轉底時候不可如  
此偏滯求也

天轉也非自東而西也非旋環磨轉却是側轉

問康節論六合之外恐無外否曰理無内外六合之形  
須有内外日從東畔升西畔沈明日又從東畔升這  
上面許多下面亦許多豈不是六合之内歷家算氣  
只算得到日月星辰運行處上去更算不得安得是

無內外

問天地之心亦靈否還只是漠然無為曰天地之心不可道是不靈但不如人恁地思慮伊川曰天地無心而成化聖人有心而無為

問天地之心天地之理理是道理心是主宰底意否曰心固是主宰底意然所謂主宰者即是理也不是心外別有箇理理外別有箇心又問此心字與帝字相似否曰人字似天字心字似帝字

問天地無心仁便是天地之心若使其有心必有思慮  
有營為天地曷嘗有思慮來然其所以四時行百物  
生者蓋以其合當如此便如此不待思維此所以為  
天地之道曰如此則易所謂復其見天地之心正大  
而天地之情可見又如何如所說祇說得他無心處  
耳若果無心則須牛生出馬桃樹上發李花他又却  
自定程子曰以主宰謂之帝以性情謂之乾他這名  
義自定心便是他箇主宰處所以謂天地以生物為

心

天地別無勾當只是以生物為心一元之氣運轉流通  
略無停間只是生出許多萬物而已問程子謂天地  
無心而成化聖人有心而無為曰這是說天地無心  
處且如四時行百物生天地何所容心至於聖人則  
順理而已復何為哉所以明道云天地之常以其心  
普萬物而無心聖人之常以其情順萬事而無情說  
得最好問普萬物莫是以心周徧而無私否曰天地

以此心普及萬物人得之遂為人之心物得之遂為物之心草木禽獸接著遂為草木禽獸之心只是一箇天地之心爾今須要知得他有心處又要見得他無心處只恁定說不得

萬物生長是天地無心時枯槁欲生是天地有心時造化之運如磨上面常轉而不止萬物之生似磨中撒出有粗有細自是不齊又曰天地之形如人以兩椀相合貯水於內以手常常掉開則水在內不出稍住

手則水漏矣

天在四畔地居其中減得一尺地遂有一尺氣但人不見耳此是未成形者及至浮而上升而下則已成形者若融結糟粕煨燼即是氣之渣滓要之皆是示人以理

晝夜運而無息便是陰陽之兩端其四邊散出紛擾者便是游氣以生人物之萬殊如麪磨相似其四邊只管層層散出天地之氣運轉無已只管層層生出人

物其中有粗有細如人物有偏有正

帝是理為主

蒼蒼之謂天運轉周流不已便是那箇而今說天有箇人在那裏批判罪惡固不可說道全無主之者又不可這裏要人見得

問經傳中天字曰要人自看得分曉也有說蒼蒼者也  
有說主宰者也有單訓理時

天以氣而依地之形地以形而附天之氣天包乎地

特天中之一物爾天以氣而運乎外故地權在中間  
隕然不動使天之運有一息停則地須陷下

李通云地上便是天

天地不怨謂肅殺之類

問天有形質否曰無只是氣旋轉得緊如急風然至上  
面極高處轉得愈緊若轉纔慢則地便脫墜矣

道家有高處有萬里剛風之說便是那裏氣清緊低處  
則氣濁故緩散想得高山更上去立人不住了那裏



氣又緊故也離騷有九天之說注家妄解云有九天據某觀之只是九重盖天運行有許多重數裏面重數較軟至外面則漸硬想到第九重只成硬殼相似那裏轉得又愈緊矣

生物之初陰陽之精自凝結成兩箇盖是氣化而生如蟲子自然爆出來既有此兩箇一牝一牡後來却從種子漸漸生去便是以形化萬物皆然

天地形而下者乾坤形而上者天地乾坤之形殼乾坤

天地之性情

夫乾其靜也專其動也直是以大生焉夫坤其靜也翕其動也闢是以廣生焉本義云乾一而實故以質言而曰大坤二而虛故以量言而曰廣學者不曉請問曰此兩句解得極分曉蓋言以形言之則天包地外地在天中所以說天之質大以理與氣言之則地却包著天天之氣却盡在地之中地盡承受那天之氣所以說地之量廣大只是一箇物事一故實從裏面

便實出來流行發生只是一箇物事所以說乾一而實地雖是堅然却虛所以天之氣流行乎地之中皆從地裏發出來所以說坤二而虛用之云地形如肺形質雖硬而中本虛故陽氣升降乎其中無所障礙雖金石也透過去地便承受得這氣發育萬物曰然要之天形如一箇鼓鞀天便是那鼓鞀外面皮殼子中間包得許多氣開闔消長所以說乾一而實地只是箇物事中間盡是這氣升降往來緣中間虛故容

得這升降來往以其色得地所以說其質之大以其容得天之氣所以說其量之廣非是說地之形有盡故以量言也只是說地盡容得天之氣所以說其量之廣爾

或問伊川說以主宰謂之帝孰為主宰曰自有主宰蓋天是箇至剛至陽之物自然如此運轉不息所以如此必有為之主宰者這樣處要人自見得非言語所能盡也因舉莊子孰網維是孰主張是十數句曰他

也見得這道理

列子曰天積氣日月星宿亦積氣中之有光耀者此言  
得之或問天地壞也不壞曰既有形氣如何得不壞  
但一箇壞了便有一箇生得來

以上語類  
三十九條

問康節天地自相依附之說燔以為此說與周子太極  
圖程子動靜無端陰陽無始之義一致非歷家所能  
窺測曰康節之言大體固如是矣然歷家之說亦須  
考之方見其細密處如禮記月令疏及晉天文志皆

不可不讀也

答李敬子

問清濁以氣言剛柔美惡以氣之為質言清濁恐屬天  
剛柔美惡恐屬地曰陳了翁云天氣而地質前輩已

有此說矣

答徐彥章

天地之間品物萬形各有所事惟天確然於上地隤然  
於下一無所為只以生物為事故易曰天地之大德  
曰生而程子亦曰天只是以生為道其論復見天地  
之心又以動之端言之其理亦已明矣然所謂以生

為道者亦非謂將生來做道也

荅張欽夫

康節所著漁樵對問論天地自相依附形有涯而氣無

涯極有條理當時想是如此說故伊川然之

荅呂伯恭○以

上文集

四條

陰陽 五行 時令

天地統是一箇大陰陽一年又有一年之陰陽一月又

有一月之陰陽一日一時皆然

以下論陰陽

陰陽五行之理須常常看得在目前則自然牢固矣

五行相為陰陽又各自為陰陽

得五行之秀者為人只說五行而不言陰陽者蓋做這人須是五行方做得成然陰陽便在五行中所以周子云五行一陰陽也舍五行無別討陰陽處如甲乙屬木甲便是陽乙便是陰丙丁屬火丙便是陽丁便是陰不須更說陰陽而陰陽在其中矣或曰如言四時而不言寒暑耳曰然

陽無驟生之理如冬至前半月中氣是小雪陽已生三



十分之一分到得冬至前幾日須已生到二十七八  
分到是日方始成一晝不是昨日全無今日一旦便  
都復了大抵剝盡處便生莊子云造化密移疇覺之  
哉這語自說得好又如列子亦謂運轉無已天地密  
移疇覺之哉凡一氣不頓進一形不頓虧亦不覺其  
成不覺其虧蓋陰陽浸消浸盛人之一身自少至老  
亦莫不然

天地間只有一箇陰陽故程先生云只有一箇感與應

所謂陰與陽無處不是且如前後前便是陽後便是陰又如左右左便是陽右便是陰又如上下上面一截便是陽下面一截便是陰問先生易說中謂伏羲作易驗陰陽消息兩端而已此語最盡曰陰陽雖是兩箇字然却只是一氣之消息一進一退一消一長進處便是陽退處便是陰長處便是陽消處便是陰只是這一氣之消長做出古今天地間無限事來所以陰陽做一箇說亦得做兩箇說亦得

又問氣之發散者為陽收斂者為陰否曰也是如此如  
鼻氣之出入出者為陽收回者為陰入息如螺螄出  
殼了縮入相似是收入那出不盡底若只管出去不  
收便死矣問出入息畢竟出去時漸漸消到得出盡  
時便死否曰固是如此然那氣又只管生

天地間一陰一陽如環無端便是相勝底道理陰符經  
說天地之道浸故陰陽勝浸字最下得妙天地間不  
陡頓恁地陰陽勝

大抵言語兩端處皆有陰陽如開物成務開物是陽成  
務是陰如致知力行致知是陽力行是陰周子之書  
屢發此意推之可見

橫渠言游氣紛擾合而成質者生人物之萬殊其陰陽  
兩端循環不已者立天地之大義說得似稍支離只  
合云陰陽五行循環錯綜升降往來所以生人物之  
萬殊立天地之大義

問一故神曰橫渠說得極好須當仔細看但近思錄所

載與本書不同當時緣伯恭不肯全載故後來不曾  
與他添得一故神橫渠親注云兩在故不測只是這  
一物却周行乎事物之間如所謂陰陽屈伸往來上  
下以至於行乎什百千萬之中無非這一箇物事所  
以謂兩在故不測兩故化注云推行乎一凡天下之  
事一不能化惟兩而後能化且如一陰一陽始能化  
生萬物雖是兩箇要之亦是推行乎此一爾此說得  
極精須當與他子細看

神化兩字雖程子說得亦不甚分明惟是橫渠推出來

推行有漸為化合一不測為神又曰一故神

兩在故不測

兩故化言兩在者或在陰或在陽在陰時全體都是陰在陽時全體都是陽化是逐一挨將去底一日復一日一月復一月節節挨將去便成一年這是化直卿云一故神猶一動一靜互為其根兩故化猶動極而靜靜極復動

橫渠言陰聚之陽必散之一段却見得陰陽之情

五行一陰陽也陰陽一太極也太極本無極也此當思  
無有陰陽而無太極底時節若以為止是陰陽陰陽  
却是形而下者若只專以理言則太極又不曾與陰  
陽相離正當沈潛玩索將圖象意思抽開細看又復  
合而觀之某解此云非有離乎陰陽也即陰陽而指  
其本體不雜乎陰陽而為言也此句自有三節意思  
更宜深考通書云靜而無動動而無靜物也動而無  
動靜而無靜神也當即此蕪看之

問動而生陽靜而生陰注太極者本然之妙動靜者所  
乘之機太極只是理理不可以動靜言惟動而生陽  
靜而生陰理寓於氣不能無動靜所乘之機乘如乘  
載之乘其動靜者乃乘載在氣上不覺動了靜靜了  
又動曰然又問動靜無端陰陽無始那箇動又從上  
面靜生下上面靜又是上面動生來今姑把這箇說  
起曰然

問太極動而生陽是陽先動也今解云必體立而用得



以行如何曰體自先有下言靜而生陰只是說相生無窮耳

統言陰陽只是兩端而陰中自分陰陽陽中亦有陰陽乾道成男坤道成女男雖屬陽而不可謂其無陰女雖屬陰亦不可謂其無陽人身氣屬陽而氣有陰陽血屬陰而血有陰陽

問陰陽動靜以大體言則春夏是動屬陽秋冬是靜屬陰就一日言之晝陽而動夜陰而靜就一時刻言

之無時而不動靜無時而無陰陽曰陰陽無處無之  
橫看豎看皆可見橫看則左陽而右陰豎看則上陽  
而下陰仰手則為陽覆手則為陰向明處為陽背明  
處為陰正蒙云陰陽之氣循環迭至聚散相盪升降  
相求絪縕相揉相兼相制欲一之不能蓋謂是也  
厚之問陽變陰合如何是合曰陽行而陰隨之

陰陽有相對而言者如東陽西陰南陽北陰是也有錯  
綜而言者如晝夜寒暑一箇橫一箇直是也伊川言

易變易也只說得相對底陰陽流轉而已不說錯綜

底陰陽交互之理言易須兼此二意

體在天地後用起天地先對待

底是體流行底是用體靜而用動。以上語類二十條

陰陽只是一氣陰氣流行即為陽陽氣凝聚即為陰非直有二物相對也此理甚明周先生於太極圖中已

言之矣

答楊元範

謂一陰一陽之謂道已涉形器五性為形而下者恐皆未然陰陽固是形而下者然所以一陰一陽者乃理

也形而上者也五事固是形而下者然五常之性則

理也形而上者也

答楊子順

問蔡文云天根是好人之情狀月窟是小人之情狀三十六宮是八卦陰陽之文某疑人物二字恐未可便以善惡斷之又言三十六宮都是春即月窟亦為春也曰陽善陰惡聖賢如此說處極多盖自正理而言二者固不可相無以對待而言則又各自有所主康節所詠恐是指生物之源而言則正氣為人偏氣為

物為陰陽之辨李通所論却是推說然意亦通也

甘荅

吉甫

問蔡丈言天根為好人之情狀月窟為小人之情狀又云陰陽都將做好說也得以陰為惡陽為善亦得伏蒙賜教以為陽善陰惡聖賢如此說處極多蓋自正理而言二者固不可相無以對待而言則又各有所主某疑康節先言天根月窟是合偏正而言後言以為都是春者是專以正者言之不知是否曰看遺書

中善惡皆天理及惡亦不可不謂之性不可以濁者  
不謂之水等語及易傳陽無可盡之理一節即此義  
可推矣更以事實考之只如鴟梟蝮蝎惡草毒藥還  
可道不是天地陰陽之氣所生否

荅甘  
吉甫

盈天地之間所以為造化者陰陽二氣之終始盛衰而  
已陽生於北長於東而盛於南陰始於南中於西而  
終於北故陽常居左而以生育長養為功其類則為  
剛為明為公為義而凡君子之道屬焉陰常居右而

以夷傷慘殺為事其類則為柔為暗為私為利而凡  
小人之道屬焉聖人作易畫卦繫辭於其進退消長  
之際所以示人者深矣

傅伯拱  
字序

陰陽之氣相勝而不能相無其為善惡之象則異乎此  
蓋以氣言則動靜無端陰陽無始其本固並立而無  
先後之序善惡之分也若以善惡之象而言則人之  
性本獨有善而無惡其為學亦欲去惡而全善不復  
得以不能相無者而為言矣今以陰陽為善惡之象

而又曰不能相無故必曰小人日為不善而善心未嘗不聞見以為陰不能無陽之證然則曷不曰君子日為善而惡心亦未嘗不聞見以為陽不能無陰之證耶蓋亦知其無是理矣且又曰克盡已私純是義理亦不離乎陰陽之正則善固可以無惡矣所謂不能相無者又安在耶大凡義理精微之際合散交錯其變無窮而不相違悖且以陰陽善惡論之則陰陽之正皆善也其沴皆惡也

周子所謂剛善剛惡柔亦如之者是也以象



類言則陽善而陰惡以動靜言則陽客而陰主此類

甚多要當大其心以觀之不可以一說拘也

荅王  
子合

陰陽盈天地之間其消息闔闢終始萬物觸目之間有  
形無形無非是也而蘇氏以為象立而陰陽隱凡可  
見者皆物也非陰陽也失其理矣達陰陽之本者固  
不指生物而謂之陰陽亦不別求陰陽於物象見聞

之外也

蘇氏易  
解辨

一陰一陽往來不息舉道之全體而言莫著於此者矣

而以為借陰陽以喻道之似則是道與陰陽各為一物借此而況彼也陰陽之端動靜之機而已動極而靜靜極而動故陰中有陽陽中有陰未有獨立而孤居者此一陰一陽所以為道也今日一陰一陽者陰陽未交而物未生廓然無一物不可謂之無有者道之似也然則道果何物乎此皆不知道之所以為道而欲以虛無寂滅之學揣摩而言之故其說如此

蘇氏

易解  
辨

夫謂溫厚之氣盛於東南嚴凝之氣盛於西北者禮家之說也謂陽生於子於卦為復陰生於午於卦為姤者歷家之說也謂巽位東南乾位西北者說卦之說也此三家者各為一說而禮家歷家之言猶可相通至於說卦則其卦位自為一說而與彼二者不相謀矣今來教乃欲合而一之而其間又有一說之中自相乖戾者此某所以不能無疑也夫謂東南以一陰已生而為陰柔之位西北以一陽已生而為陽剛之

位則是陽之盛於春夏者不得為陽陰之盛於秋冬者不得為陰而反以其始生之微者為主也謂一陰生於東南一陽生於西北則是陰不生於正南午位之遇而滯於東陽不生於正北子位之復而旅於西也謂巽以一陰之生而位乎東南則乾者豈一陽之生而位於西北乎況說卦之本文於巽則但取其潔齊於乾則但取其戰而已而未嘗有一陰一陽始生之說也凡此崎嶇反復終不可通不若直以陽剛為

仁陰柔為義之明白而簡易也蓋如此則發生為仁  
肅殺為義三家之說皆無所悟肅殺雖似乎剛然實  
天地收斂退藏之氣自不妨其為陰柔也

荅袁  
機仲

論十二卦則陽始於子而終於巳陰始於午而終於亥  
論四時之氣則陽始於寅而終於未陰始於申而終  
於丑此一說者雖若小差而所爭不過二位蓋子位  
一陽雖生而未出乎地至寅位泰卦則三陽之生方  
出地上而溫厚之氣從此始焉巳位乾卦六陽雖極

而溫厚之氣未終故午位一陰雖生而未害於陽必  
至未位遯卦而後溫厚之氣始盡也其午位陰已生  
而嚴凝之氣及申方始亥位六陰雖極而嚴凝之氣  
至丑方盡義亦倣此蓋地中之氣難見而地上之氣  
易識故周人以建子為正雖得天統而孔子之論為  
邦乃以夏時為正蓋取其陰陽始終之著明也按圖

以推其說可見

答袁  
機仲

朱論以東南之溫厚為仁西北之嚴凝為義此鄉飲酒

義之言也然本其言雖分仁義而無陰陽柔剛之別  
但於其後復有陽氣發於東方之說則固以仁為屬  
乎陽而義之當屬乎陰從可推矣來諭乃不察此而  
必欲以仁為柔以義為剛此既失之而又病夫柔之  
不可屬乎陽剛之不可屬乎陰也於是強以溫厚為  
柔嚴凝為剛又移北之陰以就南而使主乎仁之柔  
移南之陽以就北而使主乎義之剛其於方位氣候  
悉反易之而其所以為說者率皆參差乖迤而不可

合又使東北之為陽西南之為陰亦皆得其半而失其半愚於圖子已具見其失矣蓋嘗論之陽主進而陰主退陽主息而陰主消進而息者其氣強退而消者其氣弱此陰陽之所以為柔剛也陽剛溫厚居東南主春夏而以作長為事陰柔嚴凝居西北主秋冬而以斂藏為事作長為生斂藏為殺此剛柔之所以為仁義也以此觀之則陰陽剛柔仁義之位豈不曉然而彼揚子雲之所謂於仁也柔於義也剛者乃自



其用處之末流言之蓋亦所謂陽中之陰陰中之陽固不妨自為一義但不可以雜乎此而論之爾

答袁機仲

○以上文  
集十一條

問前日先生答書云陰陽五行之為性各是一氣所稟而性則一也兩性字同否曰一般又曰同者理也不同者氣也又曰他所以道五行之生各一其性節復問這箇莫是木自是木火自是火而其理則一先生應而曰且如這箇光也有在硯蓋上底也有在墨上

底其光則一也

以下論五行

氣之精英者為神金木水火土非神所以為金木水火土者是神在人則為理所以為仁義禮智信者是也金木水火土雖曰五行各一其性然一物又各具五行之理不可不知康節却細推出來

天一自是生水地二自是生火生水只是合下便具得濕底意思木便是生得一箇軟底金便是生出一箇硬底五行之說正蒙中說得好又曰木者土之精華也

又曰水火不出於土正蒙一段說得最好不胡亂下一字  
問黃寺丞云金木水火體質屬土曰正蒙有一說好只  
說金與木之體質屬土水與火却不屬土問火附木  
而生莫亦屬土否曰火自是箇虛空中物事問只溫  
熱之氣便是火否曰然

水火清金木濁土又濁

論陰陽五行曰康節說得法密橫渠說得理透邵伯溫  
載伊川言曰向惟見周茂叔語及此然不及先生之

有條理也欽夫以爲伊川未必有此語蓋伯溫妄載  
某則以爲此語恐誠有之

陰以陽爲質陽以陰爲質水內明而外暗火內暗而外  
明橫渠曰陰陽之精互藏其宅正此意也

清明內影濁明外影清明金水濁明火日

陽變陰合初生水水火水火氣也流動閃鑠其體尚虛其  
成形猶未定次生木金則確然有定形矣水火初是  
自生木金則資於土五金之屬皆從土中旋生出來

大抵天地生物先其輕清以及重濁天一生水地二生火二物在五行中竅輕清金木復重於水火土又重於金木如論律呂則又重濁為先宮竅重濁商次之角次之徵又次之羽竅後

以上語類  
十一條

陰陽之為五行有分而言之者如木火陽而金水陰也有合而言之者如木之甲火之丙土之戊金之庚水之壬皆陽而乙丁己辛癸皆陰也以此推之健順五

常之理可見

荅黃商伯

問一曰水二曰火三曰木四曰金五曰土竊謂氣之初  
溫而已溫則蒸溽蒸溽則條達條達則堅凝堅凝則  
有形質五者雖一有俱有然推其先後之序理或如  
此曰向見吳斗南說五事庶徵皆當依此為序其言  
亦有理

荅黃  
商伯

問二氣五行造化萬物一闔一闢萬變是生所謂五行  
之氣即雷風水火之運耶又即二氣之參差散殊者  
耶先儒謂物物皆具則人之氣稟有偏重者謂之皆

具可乎或謂雖物皆具而就五行之中有得其多者  
有得其少者於此思之殊茫然未曉曰五行之氣如  
溫涼寒暑燥濕剛柔之類盈天地之間者皆是舉一  
物無不具此五者但其間有多少分數耳

五音五色  
五味之類

皆是也○  
答呂子約

問以質而語其生之序則曰水火木金土而水木陽也  
火金陰也此豈就圖而指其序耶而水木何以謂之  
陽火金何以謂之陰曰天一生水地二生火天三生

木地四生金一三陽也二四陰也

荅林子玉

問以氣而語其行之序則木火土金水而木火陽也金水陰也此豈即其運用處而言之耶而木火何以謂之陽金水何以謂之陰曰此以四時而言春夏為陽秋冬為陰

荅林子玉

上文集五條

問學者云古人排十二時是如何諸生思未得先生云志字從之從心乃是心之所之古昔字從之從日亦是日之所至蓋日至於午則謂之午時至未則謂之



未時十二時皆如此推古者訓日字實也月字缺也  
月則有缺時日常實是如此如天行亦有差月星行  
又遲趕他不上惟日鐵定如此又云看北斗可以見  
天之行

以下論  
時令


數只是算氣之節候大率只是一箇氣陰陽播而為五  
行五行中各有陰陽甲乙木丙丁火春屬木夏屬火  
年月日時無有非五行之氣甲乙丙丁又屬陰屬陽  
只是二五之氣人之生適遇其氣有得清者有得濁

者貴賤壽夭皆然故有參錯不齊如此

陽變陰合而生水火木金土陰陽氣也生此五行之質  
天地生物五行獨先地即是土土便包含許多金木  
之類天地之間何事而非五行五行陰陽七者滾合  
便是生物底材料五行順布四時行焉金木水火分  
屬春夏秋冬土則寄旺四季如春屬木而清明後十  
二日即是土寄旺之時每季寄旺十八日共七十二  
日唯夏季十八日土氣為最旺故能生秋金也以圖

象考之木生火金生水之類各有小畫相牽連而火  
生土土生金獨穿乎土之內餘則從旁而過為可見

矣  
以上語  
類三條



御纂朱子全書卷四十九